

pendent; cuiusmodi sunt quae ad religionem spectant¹. *Anarchia*; tum quia, cum nullibi nunc existat illud pactum sociale, nulla existeret legitima auctoritas, ac proinde unusquisque facultatem haberet contra existentes auctoritates insurgendi; tum quia populus, cum totius ordinis politici fons et principium sit, posset illum pro libitu suo quotidie communare, et inverttere, et principes utpote a se demandatos e solo deiicere.

92. Prop. 2^o. *Potesialis civilis origo repetenda est a Deo.*

Probatur. Societas civilis, uti iam ostendimus², absque supremo imperante existere non potest. Atqui naturale est cuique rei id, sine quo non potest ipsa existere, unde « quaelibet res naturaliter conservat se in esse, et corruptientibus resistit, quantum potest³ ». Ergo potestas civilis ad naturam ipsam societatis pertinet; proindeque a Deo, qui naturae societatis est auctor, suam sumit originem. Quod argumentum amplius ex eo confirmatur, quod ordo, quem societas naturaliter expostulat, sine supraena potestate consistere nequit; et ideo principium, ex quo haec proficiscitur, oportet, ut idem sit, ac principium ordinem rerum constituens, idest divina Sapientia. Quam veritatem PP. apertis verbis professi fuere. Puta, Tertullianus, ostendens Christianos ad obediendum regibus, etsi infidelibus, teneri, inquit: « Christianus nullius est hostis, nedum imperatoris, quem sciens a Deo constitui, necesse est ut et ipsum diligat, et revereatur, et honoret, et salvum esse velit⁴ ». Et Theophilus Patriarcha Antiochenus: « Deum, non Caesarem adorabo, sciens Caesarem ab Ipso esse ordinatum⁵ ». Hinc s. Augustinus: « Prorsus Divina' Providentia constituuntur regna humana⁶ ».

¹ Hinc Rousseauius iubet morte plectendum, qui religionem, quae cum ea sit, plebis consulto decretam non profitetur; lib. IV, c. 8.

² P. 133-134.

³ 2^a 2^{ae}, q. XLIV, a. 5 c.

⁴ *Adv. Scapul.*, c. 2.

⁵ *Ad Autolicum*, lib. I, apud Bern. Marechal, *Concordantia sanctorum Patrum Ecclesiae graecae atque latinae*, t. I, p. 75, Augustae Vindelicorum 1769.

⁶ *De Civ. Dei*, lib. V, c. 4.

ART. VIII. *Aquinatis doctrina adversus Spedalierum exhibetur*

93. Utriusque, quam demonstravimus, propositionis veritatem iterum ac tertio s. Thomas tanta evidentia insinuat, ut vix intelligatur, quomodo Nicolaus Spedalieri pacti socialis patronus eo processerit; ut suam sententiam ab Aquinate iam antea assertam esse affirmaverit¹. Sane, secundum sanctum Doctorem, 1^o auctoritas regis est velut quaedam derivatio auctoritatis paternae: « Regimen regis super civitatem, vel gentem processit a regimine antiquioris in domo, vel vico²; unde « aliquando reges populorum patres vocantur³ ». Iam sicut auctoritas paterna non quidem ab aliquo inter patrem, et filium pacto, sed naturaliter patri indita est, ita auctoritas regis; adeo ut non quia populus se in potestatem regis subiicit, regna constituantur, sed potius « civitates et regna constituantur ex his, qui sunt subditi⁴ ».

2^o Comparationem instituens inter Deum mundi gubernatorem, et regem, inquit: « Similitudo divini regiminis inventur in homine . . . quantum ad hoc, quod per rationem unius hominis regitur multitudo: quod maxime pertinet ad officium regis. Hoc igitur officium rex se suscepisse cognoscat, ut sit in regno . . . sicut Deus in mundo. Quod si diligenter recognitet, . . . iustitiae in eo zelus accenditur, dum considerat ad hoc se positum, ut loco Dei iudicium in regno exerceat⁵ ». Ast huiusmodi comparatio institui haud posset, si a populo potestas regi conferretur; neque hic *locum Dei*, sed *locum populi* iudicium in regno exerceret.

3^o Expressa verba *iuris divini, ordinalis divinae* sanctus Doctor adhibet, cum de potestate regis loquitur. . . « Sicut actiones rerum naturalium procedunt ex potentiss naturalibus; ita etiam operationes humanae procedunt ex humana voluntate. Oportuit autem in rebus naturalibus, ut superiora mo-

¹ *De' diritti dell'uomo*, lib. I, c. 17, Appendice, p. 93 sqq, Assisi 1791.

² In lib. I Politie., lect. I.

³ *De Regim. Princ.*, lib. I, c. 1.

⁴ In lib. I Politie., lect. I.

⁵ *De Regim. Princ.*, lib. I, c. 12.

verent inferiora ad suas actiones per excellentiam naturalis virtutis collatae divinitus. Unde etiam oportet in rebus humanis, quod superiores moveant inferiores per suam voluntatem ex vi auctoritatis divinitus ordinatae. Movere autem per rationem, et voluntatem est praecipere. Et ideo sicut ex ipso ordine naturali divinitus instituto inferiora in rebus naturalibus necesse habent subiici motioni superiorum; ita etiam rebus humanis ex ordine juris naturalis, et divini tenentur inferiores suis superioribus obedire¹.

94. Somniari autem videtur Spedalierius, cum Aquinatis doctrinam ita interpretatur, ut potestas civilis a Deo, tamquam causa generali, aequa ac naturales effectus causarum secundarum, derivetur. Etenim in primis, quae hac ratione a Deo proveniunt, *iuris naturalis et Divini esse*, ineptum est asserere. Deinde s. Thomas, secundum Apostoli doctrinam², inquit *esse a Deo potestalem principum, in quantum talis est, et ordinem, quo inferiores potestatibus superioribus subiiciuntur*; ac proinde eum, qui contra hunc ordinem resistit potestati, *Dei ordinationi resistere*³. At certe 1° Divinae ordinationi haud resistit, qui actioni obsistit causae secundae, quae a Deo, tamquam causa universalis, pendet; secus ordinationi Divinae resistere dicendus foret, qui, e. g., vitam sibi aggredientis vim, quae etiam pendet a Deo, tamquam primo movente, retundere conatur; 2° Potestas civilis a Deo dimanat eadem ratione, qua ordinem servari Ipse iubet: atqui Deus ordinem servari praecipit per legem naturalem, quae immediate ab Eo est⁴.

¹ 2^a 2^{ae}, q. CIV, a. 1 c. Praestat etiam legere rationem, qua loca Scripturarum, in quibus potestas regis a Deo ortum habere docetur, sanctus Doctor interpretatur. De qua re vid. Sanseverino, *La dottrina di san Tommaso sull' origine del potere, e sul preteso diritto di resistenza*, § VI, p. 32 sqq, ed. cit.

² Rom., XIII, 1-2.

³ In h. l.

⁴ Monere etiam praestat, s. Thomam eadem ratione, ac PP. (cf p.140), illud docuisse, quod etiam infidelibus principibus fideles populi se subiucere tenentur. Quod certe non docuisset, si auctoritatem ex pacto, non autem a Deo putasset esse repetendam. « Distinctio, inquit, fidelium et infidelium secundum se considerate non tollit dominium et praelationem infidelium supra fideles » (2^a 2^{ae}, q. X, a. 10 c.). Et

ART. IX. *De subiecto, in quo potestas civilis ab ipsa origine residet*

95. Ea, quae hactenus ostendimus, circa divinam potestatis civilis originem, ad ipsam per se, seu obiective consideratam spectant. Quod si haec potestas inspicatur relata ad subiectum, in quo residet, non pauci ex optimae notae theologis, inter quos Bellarminus¹, et Suarez², docent hanc potestatem a Deo toti multitudini, tamquam subiecto, collatam esse, quae, cum non possit illam per se exercere, tenetur eam in unum, vel alios transferre. Quocirca, secundum hanc sententiam, potestas civilis a Deo mediate tantum principibus confertur.

96. Sed communior atque verior sententia negat auctoritatem primitus in multitudine essentialiter residere, atque ab ea in principem transferri; docetque supremam auctoritatem a Deo immediate in principes devenire; ita tamen, ut persona principis ex aliquo facto humano determinetur, quo posito, Deus immediate auctoritatem ei conferat.

97. Sane, si multitudo ex Divina ordinatione esset auctoritatis subiectum, vel eam per se exercere posset, vel non. Iam ex primo consequitur, democratiam dumtaxat esse naturalem regiminis formam et a Deo praeordinatam; id quod omnino falsum est. Ex altero autem illud existeret absurdum, Deum imperandi facultatem multitudini tribuisse, simulque hanc ad illius exercitium ineptam fecisse.

98. Insuper, hanc alteram sententiam PP. insinuasse videntur; siquidem loca Scripturarum, in quibus potestas a Deo esse asseritur, iis verbis interpretantur, ut illam principi immediate a Deo conferri haud obscure significant. Ita

(ibid., q. CIV, a. 6 c.): « Fides Christi est iustitiae principium et causa, et ideo per fidem non tollitur ordo iustitiae, sed magis firmatur. Ordo autem iustitiae requirit, ut inferiores suis superioribus obdiant, aliter enim non posset humanarum rerum status conservari. Et ideo per fidem Christi non excusantur fideles, quia principibus saecularibus obdiren teneantur ».

¹ De Laicis, lib. I, c. 6.

² De Leg., lib. III, c.3-4; *Defensio Fidei Catholicae etc.*, lib. III, c.2.

Tertullianus inquit: « Inde est imperator, unde et homo antequam imperator; inde potestas illi, unde et spiritus¹; nempe sicut Deus est, qui immediate creat spiritum, illumque in corpus generatum infundit; ita Deus immediate confert potestatem personae, quae vel per electionem populi, vel per aliud factum humanum determinatur ad principatum suscipiendum. Et alibi: « Colimus imperatorem, sic et quomodo nobis licet, et ipsi expedit, ut hominem a Deo secundum, et quidquid est, a Deo consecutum, et solo Deo minorem². Eadem ratione loquitur s. Irenaeus: « Quae sunt potestates, a Deo ordinatae sunt. . . Cuius enim iussu homines nascuntur, huius iussu et reges constituantur³. » Denique, ceteris omissis⁴, s. Augustinus: « Non tribuamus, ait, dandi regni atque imperii potestatem, nisi vero Deo⁵ ».

99. Neque argumento, quo sententia opposita superstruitur, vim inesse nobis videtur. A Suaresio enim ita illud exhibetur: « Suprema potestas, prout est immediate a Deo, solum intelligitur esse in tota communitate, non in aliqua parte eius. . . Et ratio manifesta est, quia ex vi rationis naturalis nulla potest excogitari ratio, cur haec potestas determinetur ad unam personam, vel ad certum numerum personarum, infra totam communitatem, magis, quam ad alium. Ergo ex vi naturalis concessionis solum est immediate in communitate⁶. » At vero, homines individui, quibus societas coalescit, si abstracte considerentur, et in illis natura humana tantum attendatur, perfecta aequalitate quidem gaudent; ac proinde nulla est ratio, cur in uno potius, quam in alio, suprema auctoritas resideat. Sed homines non existunt *in abstracto*, bene quidem *in concreto*, et in unoquoque aliquid humanae naturae acce-

dit, quo ipse aliis inaequalis sub variis respectibus existit. Porro fieri potest, ut ex illa inaequalitate, aequalitati naturali abstracte consideratae superaddita, oriatur ratio, cur uni potius quam alii Deus supremam tribuit auctoritatem¹.

100. Itaque potestas civilis non a multitudine confertur in imperantem, sed per multitudinem, vel per aliam rationem Deus illam confert imperanti. Nisi quod ad utramque sententiam recte intelligendam haec observatu digna sunt:

1° A vero longe aberrant qui cum Sthalio² asserunt, sententiam, quae potestatem civilem mediate a Deo imperanti communicari tuerit, cum *pacto sociali* affinitatem habere. Et enim illa non ex pacto, sed ex Deo auctoritatem repetit. « Haec potestas, Bellarminus inquit, est de iure naturae: non enim pendet a consensu hominum; nam, velint nolint, debent regi ab aliquo, nisi velint perire genus humanum, quod est contra naturae inclinationem. At ius naturae est ius divinum; iure igitur Divino introducta est gubernatio: et hoc videtur proprie velle Apostolus, cum dicit *Rom.* XIII, Qui potestati resistit, Dei ordinationi resistit³. » Quocirca pactum, quod hac sententia agnoscitur, a pacto sociali Rousseauii toto coelo distat. Nam hoc respicit auctoritatem ipsam creandam, sine ulla ordinatione naturae: illud e contrario originem potestatis a Deo subaudit, atque tantum respicit subjecti determinationem, in quod illa iam existens potestas transmittitur: unde similitudinem praesefert pacti, quod *politicum* appellari solet, quo nempe civitas naturali iure constituta speciale accipit formam. Neque alias, praeter pactum, legitimas potestatem acquirendi rationes isti Theologi repudiant⁴; dum e contrario potestatem tantum liberae suae voluntati factiosi acceptam referunt⁵. Ex quibus etiam colligitur, doctrina-

¹ Vid. Taparelli, *Op. cit.*, t. I, part. 2, c. 10, p. 219-220, ed. cit.

² *Storia della filos. del diritto* (trad.), lib. III, sez. 5, c. 1, p. 325 sqq, Torino 1855.

³ *De laicis*, lib. III, c. 6. « Ut illa communitas, subdit Suaresius, habeat praedictam potestatem, non est necessaria specialis voluntas hominum, sed ex natura rei consequitur, et ex providentia Auctoris naturae »; *De Leg.*, lib. III, c. 3, § 5.

⁴ Vid. Suarez, *ibid.*, c. 4, § 3-4; et *Defens. Fid.*, lib. III, c. 2, § 9.

⁵ Vid. Secondo Franco, *Risposte popolari alle obbiezioni più comuni*, c. 57, § 2, p. 686-688, Torino 1861.

¹ *Apologet.*, c. 30, p. 274, Lugduni Batavorum 1718.

² *Lib. Adv. Scapulam*, c. 2.

³ *Adv. haeres.*, lib. V, c. 24, n. 3, p. 321, *Opp. t. I*, Venetiis 1734.

⁴ Cf Tamagna, *Lettore sull' opera de' diritti dell'uomo*, Lett. I, c. 6.

⁵ *De Civ. Dei*, lib. V, c. 21. Et subdit: « Qui (regnum dat) Augusto, ipse et Neroni; qui Vespasiano, vel patri, vel filio, suavissimis imperatoribus, ipse et Domitiano crudelissimo: et, ne per singulos ire necesse sit, qui Constantino christiano, ipse apostatae Julianu ».

⁶ *Defens. Fidei Cathol.*, lib. III, c. 2. Cf etiam Bellarm., loc. cit.

nam de mediata communicatione potestatis nulli iacturae esse societati, quasi regiminis formae arbitratu populi assiduis subiicerentur mutationibus. Nam, secundum illos Theologos, postquam in aliquod determinatum subiectum auctoritas translatâ est, non amplius a subditis repeli potest; praesertim quia populus potestatē in principem transmittit, quam non ex se, sed ex Deo habet, et quam ex lege naturae illi conferre tenetur. Audiatur Suarez: « Negamus ex ea (*præfata sententia*) occasionem rebellionum aut seditionum contra legitimos principes populo dari. Nam postquam populus suam potestatem in regem transtulit, non potest iuste eadem potestate fretus suo arbitrio, seu, quoties voluerit, se in libertatem vindicare. Nam si potestatem suam regi concessit, quam ille acceptavit, eo ipso rex dominium acquisivit: ergo, quamvis rex habuerit a populo illud dominium per donationem, vel contractum, non ideo licebit populo dominium illud regi auferre, nec libertatem suam iterum usurpare. Sicut particularis persona, quae sue libertati renuntiavit, et se in servum vendidit, aut donavit, non potest postea suo arbitrio se a servitute eximere. Idem ergo est de persona ficta, seu communitate, postquam se alicui principi plene subiecit. Item, postquam populus suam potestatem regi contulit, iam se illa privavit: ergo non potest illa fretus iuste in regem insurgere; quia nimirum potestate, quam non habet; et ita non erit usus iustus, sed usurpatio potestatis¹. ».

2° Sententia, qua tenemus potestatem imperanti immediata a Deo communicari, non eo sensu accipienda est, quo ab iis intelligitur, qui regia iura exaggerant², ita nempe, ut eadem ratione conferatur potestas civilis, et ecclesiastica³. Etenim potestas ecclesiastica ita immediate est a Deo, ut Christus ipse eius formam designaverit, atque Petrum, et

¹ *Defensio Fidei Cathol.*, lib. III, c. 3.

² Vid. Damiano Romano, *La origine della società civile*, c. 2.

³ Adnotare hic praestat doctrinam *de communicatione mediata* a nonnullis Theologis Scholasticis eo consilio propugnatam esse, ut hac ratione eorum sententiae contrairent, qui originem potestatis civilis et ecclesiasticae aequiparare intendebant. Cf Balmes, *Il Protestantismo paragonato col Cattolicesimo* (trad.), t.II, c.LI, p. 180 sqq, Napoli 1848.

Apostolos Ecclesiae præfecerit: « Potestas ecclesiastica, inquit Beccanus, cum supernaturalis sit, non potest tribui, nisi a solo Deo, praesertim si sermo sit de supra ⁴ ». Potestatis autem civilis persona ex aliquo facto humano designatur, quo posito, Deus immediate ei confert auctoritatem, non quidem inusitatis mediis, sed iis, quibus, ut naturae auctor, societati providet. E. g., etiam quando populus supremum principem sibi constituit, « princeps quidem designationem habet a populo: potestatem vero non nisi a Deo tenet, ut auctore naturae... Idem plane contingit in muliere, quae sua quidem voluntate virum eligit, non ei tamen maritalis potestatis iura tribuit ⁵ ».

101. Ex his illud etiam colligitur, sententiam de immediata communicatione potestatis non esse intelligendam, quatenus ipsa determinatio subiecti a Deo immediate dimanet ³, siquidem Deus uti auctor naturae causas secundas ab hac imperii collatione minime excludit ⁴. Sane ex iure naturae haud repeti potest penes hanc, vel illam personam imperium existere: neque ex divino iure positivo, quemadmodum in quibusdam V. T. principibus evenit, quos immediate constituit, aut innungi in reges Deus iussit ⁵. Neque loca Scripturarum, in

¹ *Opusc. Theolog.*, Opusc. XXIII, c. 4. *De diversa ratione*, qua potestas ecclesiastica et civilis confertur, vid. G. Ant. Bianchi, *Della potestà e della politia della Chiesa*, t. III, lib. I, c. I, § 1; *ibid.*, § 12; et Pey, *L'autorità delle due potestà* (trad.), t. I, part. I, c. I, Massima III.

² Gerdilius, *De principatu civili*, p. 352-353, Opp. t. III, ed. cit.

³ Ita opinantur Petrus de Marca (*De concord. Sacerd. et Imper.*, lib. I, c. I, § 2), Dupinius (*De antiqua Ecclesiae Disciplina*, Dissert. 7, c. 2, § 1), Marcus Antonius de Dominais (*De republ. Christ.*, lib. VI, c. 2, § 10 sqq).

⁴ Vid. Rosmini, *Filos. della morale*, *Diritto razionale derivato*, *Diritto sociale*, lib. 4, sez. I, part. III, c. 3, art. 1, § 1.

⁵ « Ex illo universalis præcepto, ad rem inquit Thomas Cerboni, quod a Deo naturae auctore habemus de principatus supra potestate, qua societas politica regatur, una potius præ altera forma regiminis profecto non deducitur: aliunde etiam in Evangelica lege nullibi constitutum legimus, ut istae, vel illae politicae societates hac potius, quam altera forma regiminis gubernentur: tandem nonnullas politicas societas monarchico, alias aristocratico, quasdam democratico regimine gubernatas novimus; atque illud etiam compertum ha-

quibus potestatem a Deo esse adstruitur, sententiam illam insinuant. « Non est, s. Chrysostomus inquit, potestas, nisi a Deo. Quid dicens? omnis ne princeps a Deo ordinatus est? Non hoc dico, inquit. Neque enim de singulis principibus mihi sermo nunc est, sed de re ipsa. Nam quod principatus sint, et quod alii imperent, alii subiecti sint, neque omnia casu, ac temere ferantur, populis, quasi fluctibus, hinc et inde circumactis, Divinae sapientiae opus esse dico. Ideo non dixit, non enim est princeps, nisi a Deo, sed de re ipsa loquitur, dicens, *non enim est potestas, nisi a Deo: quae vero sunt potestales, a Deo ordinatae sunt.* Sic et cum quidam sapiens dicit: *a Deo adaptatur viro mulier*, hoc dicit, quia nuptias Deus constituit, non quia singulos, qui mulieres ducunt, ipse coniunxerit¹ ».

ART. X. *De titulis, quibus potestas civilis acquiritur*

102. Quoniam demonstravimus Deum esse, qui potestatem civilem subiecto confert, quod ex aliquo facto humano determinatur, quodnam sit hoc factum, explicandum nobis est.

Iam in primis advertendum est aliter rem se habere in societate primitus constituta, ac in societatibus decursu temporis efformatis. Sane, in societate primitus constituta principatus ex familia et cum familia primitus extitit. Etenim, quoniam auctoritas, utpote civitatis forma substantialis, ab ea separari non potest, principatus politicus inde oritur, unde ipsa civilis societas efflorescit. Atqui civilis societas, ut superius demonstratum est, non aliunde oritur, quam ex familiarum propagatione ex una domo, ut ex stipite communii. Ergo primum civilis auctoritatis germen in familia, ac

bemus, quod est a Deo auctore generatim institutum de principatus supra potestate suum effectum habere in regimine cum monarchico, tum aristocratico, tum democratico. Igitur politicum regimen, seu principatus suprema potestas singulariter spectata est humanae institutionis²; *De iure et legum disciplina*, t. IV, lib. 27, c. I, § IV, p. 233, Romae 1778.

¹ In Epist. ad Rom., Hom. XXIII, p. 686, Opp. t. IX, Parisiis 1731. Adversarii, nonnulla Scripturarum, et PP. testimonia pro sua opinione afferentibus, respondet laudatus Cerboni, Op. cit., c. II, § I-II, p. 239-247.

proinde in domestica auctoritate viget. « Quia, inquit s. Thomas, omnis dominus regitur ab aliquo antiquissimo, sicut a patresfamilias reguntur filii; exinde contigit, quod etiam tota vicinia, quae erat constituta ex consanguineis, regebatur ab aliquo, qui erat principalis in cognitione, sicut civitas regitur a rege. Unde Homerus dixit, quod unusquisque uxori et pueris suis instituit leges, sicut civitas regitur a rege. Ideo autem hoc regimen a dominibus et vicis processit ad civitates, quia diversi vici sunt civitas dispersa in diversas partes; et ideo antiquitus habitabant homines dispersi per vicos, non tamen congregati in unam civitatem. Sic ergo patet, quod regimen regis super civitatem vel gentem processit a regimine antiquioris in domo, vel vico³ ». Quod quidem non est intelligendum, quatenus auctoritas civilis a paterna non differt, vel haec in illam absorbetur; sed quatenus auctoritas paterna est veluti factum, quo posito, Deus communii multarum familiarium auctori civilem potestatem confert. Cum enim paterna auctoritas ad plures familias regendas apta non sit, communis plurium familiarium auctor potestatem iis regendis a Deo accipit, quam vel ad maiorem natum inter filios suos transmittit, vel ad eum, quem haeredem relinquit. Quod si quidam ex primi auctoris nepotibus ab ipsis auctoritate expresso, vel tacito consensu emancipetur, ille fit princeps novae societatis civilis, quae omnibus generationibus ex illo enatis constat².

103. Quoad autem civitates decursu temporis efformatas, facta, seu tituli, quibus tum apud illos, tum etiam diebus nostris determinatur persona, cui Deus civilem confert potestatem, sunt legitima successio, electio, victoria in bello iusto, et praescriptio. Electio in primis adhibetur, quando in societate deficit, quacumque ex causa, princeps, in quo suprema auctoritas residebat. Qua in re adnotandus est Giobertii, Mammiani, aliorumque error, qui populum ad eligendum praestantiorem ingenio teneri contendunt, quasi ius imperandi

¹ In lib. I Politic., lect. I.

² Vid. Bossuetius, *Politica estratta dalle proprie parole della sacra Scrittura* (trad.), t. I, lib. 2, art. 1, prop. 3, p. 51 sqq, Venezia 1773.

*

idem sit, ac ius docendi. Sane, non quidem praeclarum ingenium ad regendam civitatem expostulatur, sed prudentia, et iustitia: « Istaee duae virtutes sunt maxime propriae regi, scilicet prudentia, et iustitia¹ ». Insuper, consensus in electione non oportet, ut semper explicite, et libere eliciatur, sed aliquando tacite, vel necessario, puta, cum potestas in eum naturaliter defertur, qui re ipsa auctoritatem exhibit fini societatis opportunam. Hinc s. Thomas: « Si aliquis inveniatur in civitate, qui fuerit melior aliis, etiam bonis existentibus . . . huic bonum est subiici² ». Atque: « Si unus inveniatur, qui excedit omnes alios in virtute, iste debet principari³ ».

104. Supremae auctoritatis transmissio per successionem duobus modis explicari potest, vel considerando supremam potestatem tamquam ius principis, quod, sicut et cetera sua bona et iura, haeredi suo transmittit; vel dicendo ius haereditarium esse tamquam aliquam electionem eius, qui ad supremam potestatem successione accedit; quae electio semel facta est pro omnibus, qui iure haereditario sibi debent succedere. Porro hic modus potestatem transmittendi stabiliorum imperio firmitudinem tribuit⁴, aditum praeculdit intestinis dissensionibus, et partium studiis, quae maximo discrimini societatem obiicere solent, efficitque, ut designatus regni successor disciplinis, quae ad officium et munus regium pertinent, commodius faciliusque excoli possit; necnon ut futuros reges iam revereri, iisque obtemperari cives incipient. Unde ipse Machiavellius fatetur minores difficultates occurrere in tuendis statibus haereditariis, et assuetis sanguini sui principis, quam in novis⁵.

105. Quandoque autem ille, qui gentem aliquam bello iusto devicit, hanc sibi subiicit, et princeps eius constituitur. Quem titulum legitimum esse deducitur ex debito consensu, explicito, sive implicito, gentis devictae, quae eo ipso, quod

¹ 2^a 2^{ac}, q. L, a. 1 ad 1. — ² In lib. VII Polit., lect. II.

³ Ibid., lib. III, lect. XII.

⁴ Vid. Cousin, *Cours d'hist. de la phil. mor.*, leç. IX.

⁵ De Princip., c. 2.

bellum iniustum suscepit, consentit, vel consentire debuit ad victoris ditioni se subiiciendam¹. « In omnibus, ad rem s. Augustinus, fere gentibus quodammodo vox naturae ista personuit, ut subiugari victoribus mallent, quibus contigit vinci, quam bellica omnifaria vastatione deleri² ».

106. Denique circa prescriptionem quaeritur, utrum iniustus usurpator, lapsu temporis³, fieri possit princeps legitimus. Porro certum est, solam supremae auctoritatis tranquillam possessionem non esse legitimum titulum ipsius possidende, neque factum, hac de re, sufficere ad ius constitendum: « Illa, quae sine peccato esse non possunt, nulla prescriptione firmantur, quia . . . diuturnitas temporis non minuit peccatum, sed auget⁴ ». Sane, si sola possessio supremae auctoritatis esset titulus sufficiens ad eam legitime possidendam, illud foret, vel quia, ut quibusdam placet, tunc legitime censendus esset adesse populi consensus; vel quia Deus merito putabitur revera conferre supremam auctoritatem illi, qui eam tranquille possideret. Atqui neutrum dici potest. Non primum, tum quia ex eo quod populus ab usurpatore non desciscit, haud sequitur ipsum in illius usurpationem consentire; siquidem fieri potest, ut populus iugum usurpatore invitus patiatur, et prudentiae tantum obediatur, exteriorem illi obedientiam praestando: tum quia, etiamsi populus consentiret in iniustam supremae potestatis occupationem, non sequeretur eam legitimam fieri: quamdui enim existit princeps legitimus, et quamdui hic aliquam rationabilem spem habet auctoritatem recuperandi, et saltem quamdui sufficienti temporis lapsu non constat societatis interesse, ut usurpator tamquam legitimus princeps habeatur, princeps e solio electus, eiusque haeredes suo iure nequeunt spoliari. Non alterum, quia inde sequeretur, Deum omnia, quae fiunt, appro-

¹ Vid. Suarez, *De Leg.*, lib. III, c. 4, n. 4.

² De Civit. Dei, lib. XVIII, c. 2.

³ Diximus lapsu temporis; nam in actu belli potest Respublica usurpatoris, velut iniusti invasoris, vim vi repellere, « quando non est recursus ad superiorum, per quem iudicium de invasore possit fieri »; In lib. II Sent., Dist. XLIV, q. II, a. 2 ad 5.

⁴ In lib. IV Sent., Dist. XLI, q. I, a. 3, sol. 1 ad 2.

bare, sarem posse bona, quae suratus est, retinere, et nihil omnino iniustum esse; quidquid enim sit, Deo permittente, evenit¹.

107. At vero, potest, positis quibusdam circumstantiis, auctoritas per praescriptionem legitime possideri. Cum enim suprema auctoritas a Deo conferatur ad bonum publicum, merito Deus censendus est auctoritatem hanc illi conferre, quem societatis quamplurimum referat tamquam legitimum principem haber. Iam tales aliquando sunt circumstantiae, ut societatis quamplurimum referat eum haberi legitimum principem, qui nullum habet titulum a praescriptione diversum. Et sane, fieri potest, ut maxima debeat subire pericula societas ex tentaminibus, quae fierent ad usurpatorem e solio deiiciendum, et inde timenda sunt anarchia, rerum publicarum perturbatio, bella civilia, aliaque sexcenta et gravissima incommoda, absque forsitan ulla spe legitimum principem, vel eius successores in solium restituendi. Nemo autem non videt, quamplurimum referre, ut ea caveantur incommoda; quod aliter fieri non potest, nisi tamquam legitimum principem habendo, qui supremam potestatem facto obtinet². Ex quibus etiam vides praescriptionem, ubi de suprema auctoritate agitur, non in gratiam usurpatoris, sed potius in gratiam populorum, tamquam legitimum titulum admitti.

¹ Subditi autem, quamvis iuvare usurpatorem, ut in sua possessione stabiliantur, prohibeantur; tamen legibus, quae ab ipso pro bono communi et ordine sociali feruntur, obtemperare tenentur. In hoc autem potius legitimis principi morem gerunt, qui id velle presumunt; non autem usurpatori, qui, cum per violentiam dominium surripiat, non efficit vere praelatus, vel dominus (*In lib. II Sent., Dist. XLIV, q. II, a. 2 sol.*) Sane, « principibus saecularibus in tantum homo obediens tenetur, in quantum ordo iustitiae requirit. Et ideo, si non habeant iustum principatum, sed usurpatum . . . , non tenentur eis subditi obedire, nisi forte per accidens, propter vitandum scandalum, vel periculum »; ² a ² q. CIV, a. 6 ad 3.

² Vid. I. Blataircu, *Inst. phil. t. II, pars 2, Ethica specialis, c. 2, art. 3, § 2, num. 3, punct. 3, quaest. 2.p. 218, 219*, Burdigalae 1849.

ART. XI. *De variis regiminis formis*

108. Pro varietate subiecti, in quo potestas civilis determinatur, ac pro varietate iuris, quod ipsi competit quoad multitudinem dirigendam, variae distinguuntur regiminis formae.

109. Iam formae, ut aiunt, *elementares* sunt *monarchia*, *aristocracia*, et *democratia*. Regimen *monarchicum* illud est, in quo summa potestas penes unam physicam personam residet: *aristocraticum*, si penes optimates, aut concilium ex quibusdam eorum coactum: *democraticum*, si penes totius civitatis communitatem¹. Ex harum simplicium regiminis formarum diversa collatione, aliae *mixtæ* oriuntur, quae diversis subiacent mutationibus, prout singula elementa componentia diversa ratione supremam potestatem participant; atque generatim *repraesentativa* vocari solent.

110. Iam ex natura non determinatur haec, vel alia regiminis forma; atque per accidens, secundum peculiarem populi indolem, et morum conformatiōnēm, aliasque temporum et locorum diversas circumstantias, una, vel altera magis opportuna

¹ ¹ a ² q. XCV, a. 4 c. Quoniam vero numquam tota communitas potest esse subiectum supremae potestatis, formae regiminis ad *monarchiam*, et *polyarchiam* revocantur, cum numerica differentia inter multos de plebe, vel de optimatibus nequeat specificam formae regiminis diversitatem constituere, nam in utroque casu maior semper est pars eorum, qui sunt dumtaxat subditi (cf Haller, *Restauration de la science politique*, t. I, c. 20). Duæ autem illæ regiminis formæ aliam ob rationem a se iovicem differunt. Etenim in forma *monarchica* potestas cum illa persona, penes quam residet, identitatem habet; ac proinde monarca, quamvis « non sit solitus quantum ad vim directivam eius (*legis*) »; tamen « dicitur esse solitus a lege quantum ad vim coactivam legis; nullus enim proprie cogitur a seipso; lex autem non habet vim coactivam, nisi ex principiis potestate: sic igitur princeps dicitur esse solitus a lege, quia nullus in ipsum potest iudicium condemnationis ferre, si contra legem agat » (¹ a ² q. XCVI, a. 5 ad 3). Ast in regimine *polyarchico*, qui supremae potestatis sunt participes, dupli respectu sunt considerandi, nempe quatenus leges conficiunt, aliaque exercent auctoritatis iura; et quatenus sunt tantum societatis membra. Iam quatenus huiusmodi sunt, nihil a ceteris differunt, ac proinde legibus subiiciuntur, et, si eas violaverint, iudicari et puniri, aequae ac ceteri cives, possunt, nisi aliqua lege fundamentali cautum sit de modo speciali, quo habendi sint, ubi leges violaverint, qui supremam auctoritatem participant.